

四庫全書存目叢書編纂委員會編

齊魯書社

四庫全書存目叢書

集部
第三九一冊



責任編輯：孫言誠 賀 偉

ISBN 7-5333-0615-5




9 787533 306151 >

EB35/10

四庫全書存目叢書·集部三九一

(大陸版·限中國大陸發行)

四庫全書存目叢書編纂委員會編



齊魯書社出版發行

(濟南經九路勝利大街)

廣東精裝印務有限公司印製

787×1092毫米 16開本 54.375印張

1997年7月第1版 1997年7月第1次印刷

印數1-100

ISBN 7-5333-0615-5

Z·60 集部定價：127800圓

集部第三九一冊目次

集部·總集類

古文輯略不分卷(五)

〔清〕曹本榮編
江西省圖書館藏清鈔本

.....

古文輯略不分卷(五)

〔清〕曹本榮編

江西省圖書館藏清鈔本

古九

薦賢

表揚

尊禮

辭讓

書

薦賢

論盛孝章書

漢 孔 融

歲月不居時節不流五十之年忽焉已至公為始滿
融又過二海內知識零落殆盡惟會稽盛孝章尚存
其人困於孫氏妻孥湮沒車馬獨立孤危愁苦若使
憂能傷人此子不得復永年矣春秋傳曰諸侯有相
滅亡者桓公不能救則桓公恥之今孝章實丈夫之
雄也天下談士依以揚聲而身不免於幽執命不期
於旦夕是吾祖不當復論損益之友而朱穆所以絕
交也公能馳一介之使加咫尺之書則孝章可致之
道可宏矣今之少年喜誇前輩或能識乎孝章孝章
要為有天下大名九牧之人所共稱嘆燕君市駿馬
之骨非欲以騁道里乃當以招絕足也惟公臣復漢
室宗社將絕又能正之正之之術實須得賢珠玉無
經而自至者以人好之也况賢者之有足乎昭王築
臺以尊郭隗隗雖小才而逢大遇竟能發明主之至
心故樂毅自魏往劇辛自趙往鄒衍自齊往嚮使郭
隗倒懸而王不解臨溺而王不拯則士亦將高翔遠
引莫有北首燕路者矣凡所稱引自公所知而復有

云者欲公崇篤斯義也因表不悉

薦儒士任安

漢 秦 宓

昔百里蹇叔以耆艾而定策甘羅子奇以童冠而立
政故書義黃髮而易稱顏淵固知選士用能不拘長
幼明矣乃者以來海內察舉率多英雋而遺舊齒衆
論不齊異同相半此乃承平之翔步非亂世之急務
也夫欲救危撫亂修己以安人則宜卓犖超倫異時
殊起震驚鄰國駭動四方上當天心下合人意天人
既和內省不疚雖遭凶亂何憂何患昔葉公好龍神
龍下之好偽徹天何況于真今處士任安仁義直道
流名四遠如今見察則一州斯服昔湯舉伊尹不仁
者遠何武貢二龔雙名竹帛故貪尋常之高而忽爲
初之嵩樂面前之飾而忘天下之譽斯誠往古之所
重慎也甫欲鑿石索玉剖蚌求珠今乃隋和炳然有
如皎日復何疑焉誠知晝不操燭日有餘光但餘情
區區貪陳所見

興陸員外書

唐韓愈

執事好賢樂善孜孜以薦進良士明白是非為已任方今天下一人而已愈之獲幸於左右其足跡接於門牆之間陞乎堂而望乎室者亦將一年於今矣念慮所及輒欲不自疑外竭其愚而道其志況在執事之所孜孜為已任者得不少助而張之乎誠不自識其言之可采與否其事則小人之事君子盡心之道也天下之事不可遽數又執事之志或有待而為未敢一二言也今但言其最近而切者耳執事之與司

貢士者相知誠深矣彼之所望於執事執事之所以待乎彼者可謂至而無間疑矣彼之職在乎得人執事之志在乎進賢如得其人而授之所謂兩得其求順乎其必從也執事之知人其亦博矣夫子之言曰舉爾所知然則愈之知者亦可言已文章之尤者有侯喜者侯雲長者喜之家在開元中衣冠而朝者兄弟第五六人及喜之父仕不達棄官而歸喜率兄弟操耒耜而耕于野地薄而賦多不足以養其親則以其耕之暇讀書而為文以干於有位者而取足焉喜之

文章學西京而為也舉進士十五六年矣雲長之文執事所自知其為人淳重方實可任以事其文與喜相上下有劉述古者其文長於詩文麗而思深當今舉於禮部者其詩無與為比而文工於應主司之試其為人溫良誠信無邪佞詐妄之心彊忍而婉容和平而有立其趨事靜以敏著美名而負屈稱者其日已久矣有韋羣玉者京兆之從子其文有可取者其進而未止者也其為人賢而有材志剛而氣和樂於薦賢為善其在家無子弟之過居京兆之側遇事輒爭不從其令而從其義求子弟之賢而能業其家者羣玉是也凡此四子皆可以當執事首薦而極論者主司疑焉則以辨之問焉則以告之未知焉則殷勤而語之期乎有成而後止可也有沈杞者張荻者尉遲汾者李紳者張從餘者李翊者或文或行皆出羣之才也凡此數子與之足以收人望得才實主司疑焉則與解之問焉則以對之廣求焉則以告之可也往者陸相公司貢士考文章甚詳愈時亦幸在得中而未知陸之得人也其後一二年所與及第者皆赫

然有聲原其所以亦由梁補闕肅王郎中礎佐之梁
舉八人無有失者其餘則王皆與謀焉陸相之考文
章甚詳也待梁與王如此不疑也梁與王舉人如此
之當也至今以為美談自后主司不能信人人亦無
足信者故蔑蔑無聞今執事之與司貢士者有相信
之資謀行之道惜乎其不可失也方今在朝廷者多
以游讌娛樂為事獨執事眇然高舉有深思長慮為
國家樹根本之道宜乎小子之以此言聞於左右也
愈恐懼再拜

薦所知於徐州張僕射書 唐 李 翱

翱再拜齊桓公不疑於其臣管夷吾信而霸天下據
戎翟匡周室亡國存荆楚服諸侯莫不至焉豎刁易
牙信而齊國亂身死不葬五公子爭立兄弟相及者
數世桓公之信於其臣一道也所信者賢則德格於
天地功及於後世不得其人則不得其死其知人不
易也豈惟霸者為然雖聖人亦不能免焉帝堯之時
賢不肖人皆立於朝堯能知舜於是乎驩兜放共工
流殛鯀竄三苗舉禹稷皋陶二十有二人如諸上位
故堯崩三載四海遏密八音後世之人皆謂之帝堯
焉向使堯不能知舜而遂尊驩兜共工之黨於朝禹
稷皋陶之下二十有二人不能用則堯將不得為齊
桓公爾豈復得曰大哉堯之為君乎惟天為大惟堯
則之蕩蕩乎民無能名焉者哉春秋曰夏滅項孰滅
之蓋齊滅之曷不言齊滅之為桓諱也春秋為賢者
諱此滅人之國何賢爾君子之惡惡也嫉始善善也
樂終桓公嘗有繼絕存亡之功故君子為之諱繼絕
存亡賢者之事也管夷吾用所以能繼絕世存亡國

焉耳豎曰易牙用則不能也向使桓公始不用管夷
吾末有豎曰易牙爭權不葬而亂齊國則幽厲之諸
侯也始用賢而終身諱其惡君子樂用賢也如此始
不用賢以及其終而幸後世之掩其過也則微矣然
則居上位流德澤於百姓者何所勞乎勞於擇賢得
其人如諸上使天下皆化之焉而已矣今天子之大
臣有土地千里孰有如執事好賢不倦者乎蓋得其
人人亦多矣其所可求而不可取者則有人焉隴西
李觀奇士也伏聞執事知其賢將用之未及而觀病

死昌黎韓愈得古文之遺風明理亂根本之所繇伏
聞執事又知其賢將用之未及而愈爲宣武軍節度
使之所畱觀愈皆豪傑之士也如此人不時出觀自
古天下亦有數百年無如其人者焉執事皆得而知
之皆不得而用之翺實爲執事惜焉豈唯翺一人而
已後之讀前載者亦必多爲執事惜之矣茲有平昌
孟郊貞士也伏聞執事舊知之郊爲五言詩自前漢
李都尉蘇屬國及建安諸子南朝二謝郊能兼其體
而有之李觀薦郊於梁肅補闕書曰郊之五言詩其

有高處在古無上其有平處下顧而謝韓愈送郊詩
曰作詩三百首杳然咸池音彼二子皆知言者也豈
欺天下之人哉郊窮餓不得安養其親周天下無所
遇作詩曰食薺腸亦苦強歌聲無歡出門即有礙誰
謂天地寬其窮也甚矣凡賢人奇士自以所負不苟
合於世是以雖見之難得而知也見而不能知其賢
如勿見而已矣知其賢而不能用如勿知其賢而已
矣用而不能盡其才如勿用而已矣盡其才而容護
人之所間者如勿盡其才而已矣故見賢而能知知

而能用用而能盡其才而不容護人之所間者天下
一人而已矣茲有二人焉偕來其一人賢士也其一
人常人也待之禮貌不如崇焉則賢者行而常常
之人日來矣況其待常常之人禮貌加厚則善人何
求而來哉孔子曰吾未見好德如好色者聖人不好
色而好德者也雖好色而不加好德者次也德與色
均好之又其次也雖好德而不加好色者下也最甚
不好德而好色者窮矣有人告曰某所有女國色也
天下之人必將極其力而求之無所愛矣有人告曰

某所有人國士也天下之人則不能一往而先焉是豈非不好德而好色者乎賢者則宜有以別於天下之人矣孔子述易定禮樂刪詩叙書作春秋聖人也奮乎百世之上其所化之者非其道則夷狄人也而孔子之廟存焉雖賢者亦不能日往拜之以其益於人寡矣故無益於人雖孔子之廟尚不能朝夕而事焉況天下之人乎有待於人而不能禮善人良士則不如無待也嗚呼人之降年不可與期郊將為他人之所得而大有立功於世與有短命而死皆不可知也二者卒有一於郊之身他日為執事惜之不可既矣執事終不得而用之矣雖恨之亦無奈何矣黜窮賤人也直諍無讓非所宜至於此者也為道之存焉耳不直則不足以伸道也非好多言者也黜再拜

代書

唐白居易

廬山自陶謝洎十八賢已還儒風綿綿相續不絕貞元初有符載楊衡輩隱焉亦出為文人今其讀書屬文結草廬于巖谷間者欲一二十人即其中秀出者有彭城人劉軻軻開卷慕孟軻為人秉筆慕揚雄司馬遷為文故著翼孟三卷恭龍子十卷雜文百餘篇而聖人之旨作者之風雖未臻極往往而得予佐潯陽三年軻每著文輒來示予予知軻志不悉異日必能跨符楊而攀陶謝軻一旦盡齋所著書及所為文訪予告行欲舉進士予方淪落江海不足以發軻事業又羸病無心力不能徧致書于臺省故人因援紙引筆寫胷中事授軻且曰子到長安持此札為子謁集賢廩三十二補闕翰林杜杜十四拾遺金部元八員外監察牛二侍御秘書蕭正字藍田楊主簿兄弟彼七八君子皆予文友以子愚直嘗信其言苟于今不我欺則子之道庶幾光明矣又欲使平生故人知我形骸已碎志氣已憊獨好善喜才之心未死去矣去矣特此代書三月三日樂天白

與兩浙安撫陳舍人薦士書 宋 陳 襄

襄伏聞執事按部東南首訪士民德行襄請股肱近臣受主上顧託于外其志在於夙夜圖其所報則莫若未賢拔士之務為先然自昔觀風按俗之臣可有行者今執事獨能軒然振舉其事此希濶之盛美小子不任驩忭雖然但以旌旄之行所至遠連獨睽獨聽不克盡天下之賢才又恐所部之吏無告者有員執事上報君父之心襄雖愚所識近世四方豪傑之士於心過執事之能推賢不敢隱惜謹取其才行殊

尤卓絕素與之交與所聞見而知者敢以為獻焉其已仕者四人有殿中丞致仕胡瑗者博學通經員文武之道而適用不迂向在江湖間與學養士凡十餘年弟子一千七百人魁傑之士多出門下今年過六十而進德未已有舒州通判王安石者才性賢明篤於古學文辭政事已著聞於時有潁州司法叅軍劉彝者其人長於才而篤於義其政事皆通達於體要有廬州合肥縣主簿孫覺材質老成志於經學而浸究原本觀其文辭或簡而能粹殿中丞胡瑗門人高

第數百而稱其賢瑗雖老其材尚可大用惜乎未有知音者三人者皆賢者之資也將置之美地不拂其所進以育成其美材可量也哉其在下者五人福州候官縣陳烈者天性仁孝其材智超特學古明道造大賢之域自慶歷初下第閉門惜心追經十餘年兩經科詔不應里選身服仁義鄉閭宗之有同縣鄭穆者明而好學深造於道其心氣仁正勇於為義學博而文壯矣有揚州孫處者為性高介好古而志於道安貧不仕即行著聞凡為文辭必臻於理有衢州江

山縣周頴者剛義孝友及冠始學卓有奇節而不畏強禦有烈士之氣有越州蕭山縣吳孜者勇於為義少有聲律之學既而宗道約心於理甘貧養親節義稍著藝烈穆襄之友人也凡與並立於古人之域積二十年辛勤事業足見其志使之得其志而行其道其補助國家豈少哉若行已作事未敢極言俟執事見而知之可也處頴孜襄所聞而知之者雖道業不及於二三子然其行義皆足以取信於人抑亦國家偉材也夫大賢之才難知亦難其才以四海之廣環

而未之尚恐未足克執事之所欲況止於一方與一
州其所得必狹矣襄遂散廣引天下凡所知者以為
告也其次雖有樸茂礫礪之材行誼未著不敢以聞
尚觀其成其不知者尚在執事博而求之也執事即
日歸觀是號遺民疾苦事外必有獻納補報於上則
無大乎斯事而無過乎斯人也君子之於事也所患
無其道無其時無其位而不得與天下賢才共濟之
爾今執事既有其道又得其時與其位而其所以共
濟又有天下之賢才如是其不可失也心急辭率伏
惟執事留意詳采

與王丞相

宋 陳 亮

亮竊惟大丞相首秉國鈞士之歸心門下者豈但誠
服德誼要亦不能無利於其間天下之士其無未於
世者固少而吾之權又足以奔走天下之人則其勢
固然也獨亮之於門下心悅誠服而未嘗自言丞相
亦不得而知之歲杪嘗欲略布誠悃而迫歸倉卒又
成自外入春已來貧病交攻更無一日好況雖欲拜
一書以敘其本末亦復因循私切自念鄉者丞相於
客退之後促膝而命之坐使得款語良久且憂其無
用於時欲使得一試愚意懇懇雖父兄之於子弟不
是過也亮而自外於門下是曹大馬之不若故當願
自獻其愚忠惟丞相審聽之聖上天日之表本非苟
安於無事而又英明夙絕古今前後任相非一人矣
蓋亦有所甚屬意者而倚權以行其私上亦終厭之
獨丞相布誠心開公道進退則采之輿論廢置則付
之準繩事上之日久而上亦察其無他也故確然信
用而不疑久任而不拔章聖皇帝所謂王旦事朕之
日久而朕亦察之熟矣卿等有事但與王旦商量故

在中書十四五年而上不以爲疑下不以爲過丞相
今日真有祖風矣甚盛甚休非餘人所可望其間域
也亮獨有所甚憂者秦丞相主和薰炙天地身享不
過十五年又六年而和敗通止二十一年耳近者乙
酉丙戌之和本非有一定之計而今亦二十一年矣
此其勢恐不能久也南北分裂於今六十年矣此天
數之當復也阿骨打子興於今近八十年正胡運之
當衰也天下一統猶不能以五六十無事於其間
必有水旱盜賊乘時竊發之變况南北之勢而欲三
十年苟安益亦甚難矣天下無事上之所以信任宰
相者他人所不得而間也一旦緩急丞相能保上之
終任我乎奉身而退在丞相本非難事然平時之缺
望於我者能保其不以我爲奇貨乎無事則我享其
福有事則人當其難此又非丞相之素心也抱不哭
之孩兒則當之而不辭肩千鈞之重負則報然而自
退此又丞相之所當恥也亦當以區區管見窺則聖
意緩急之所用決非今日之所用也一輩無賴平居
大言以誑人交結以自鬻蓋亦有許其真能辦事者

上安得不疑其可用乎布之邊徼什之繁劇人亦往
往指目之矣異時誤國識者當議丞相之不早計也
丞相今日縱未能盡收召天下之人才當一一知其
姓名某人可當何任某人可辦何事四方之將帥當
一一察其能否某人可當一面某人可臨一陣邊陲
之急慢糧艸之虛實兵卒之強弱城壁之堅脆歷歷
在目朗然在心一旦緩急則從容爲上一言之使上
有知人未盡之歎天下有事故難量之謗雖其號有
才力者亦固在吾驅使間耳一輩無賴不得羣起而
誤國其爲天下國家之福豈淺淺哉丞相雖長東國
鈞公論當不以爲過范文正公所謂身安而後國家
可保者於丞相見之矣願丞相詳入思慮以幸斯世
非亮一人之私言也丞相苟以爲然則亮又將有裨
于慮之一得者繼此以進亮向嘗言葉適之文學與
其爲人此衆所共知丞相亦嘗首肯之矣此人極有
思慮又心事和平不肯隨時翻覆既有時名又取甲
科今一任回改官於格例極易拈掇丞相若拔擢而
用之必將有爲報效者但秀才要索事分今使之隨

例久候於逆旅恐非其所能今已餘兩月丞相若於
半月間即輟一差遣與之徐議拔擢亦無不可薛叔
似文學雖不及適然識慮精密心事和平益亦不減
向因面對上亦意其可用丞相益已將順上意矣若
併收此人更與一遷而適代之上必不以為難是丞
相一舉而得兩士亦足以厭滿天下之公論亮當以
五十口保任其終始可信也其次如陳謙之文學識
慮施邁之心事和平亦不宜久在掌固亮固願使多
士盡出門下豈敢以一時之私妄有所論薦此亦效
忠之一事也事之所當言心之所欲言者無限今直
未敢縷縷耳丞相苟察其忠誠則我決不敢於此遂
已悵悵之心伏冀鈞恕幸甚幸甚

上耶律中書書

元 元好問

四月二十有二日門下士太原元好問謹齋沐獻書
中書相公閣下易有之天造草昧君子以經綸伏惟
閣下輔佐王室奄有四方當天造草昧之時極君子
經綸之道凡所以經造功業考定制者本末次第
宜有成策非門下賤士所敢與聞獨有一事系斯文
為甚重故不得不為閣下言之自漢唐以來言良相
者在漢則有蕭曹丙魏在唐則有房杜姚宋數公者
固有致太平之功而當時百執事之人毗助贊益者
亦不為不多傳記具在蓋可考也夫天下大器非一
人之力可舉而國家所以成就人材者亦非一日之
事也從古以來士之有立於世必藉學校教育父兄
淵源師友講習三者備而後可喻如脩明堂總章必
得梗楠豫章節目礪砢萬牛挽致之材預為儲蓄數
十年之間乃能備一旦之用非若起尋丈之屋構榱
椳楔樞棧費摘雜出於榆柳槐栢可以朝來而暮足
也竊見南中大夫子歸河朔者在所有之聖者之後
如衍聖孔公耆舊如馮內翰叔獻梁都運斗南萬戶

部唐卿王廷州從之時輩如平陽王狀元綱東明王
狀元鵬賓人王貴臨淄李浩秦人張徽揚奐李庭訓
河中李獻卿武安樂夔固安李天翼沛縣劉汝翼齊
人謝良弼鄭人呂大鵬山西魏瑤澤人李恒簡李禹
翼燕人張聖俞太原張緯李謙冀致君張德輝高鳴
孟津李蔚真定李治相人胡德珪易州敬鉉雲中李
徽中山楊果東平李昶西華徐世隆濟陽張輔之燕
人曹居一王鑄渾源劉祈及其弟郁李全平定賈庭
揚楊起濟南杜仁傑洛水張仲經虞鄉麻革東明商
挺漁陽趙著平陽趙維道汝南楊鴻河中張肅河朔
勾龍瀛東勝程思溫及其從弟思中凡此諸人雖其
學業操行參差不齊要之皆天明之秀有用於世者
也百年以來教育講習非不至而其所成就者無幾
喪亂以來三四十人而止矣夫生之難成之又難乃
今不死於兵不死於寒餓造物者挈而授之維新之
朝其亦有意乎無意乎誠以閣下之力使脫措使之
尋息奔走之役聚養之分處之學館之不必盡具饌
粥足以餬口布絮足以蔽體無甚大費然施之諸家

固已骨而肉之矣他日閣下求百執事之人隨左右
而取之衣冠禮樂紀綱文章盡在於是將不能少助
閣下蕭曹兩魏房杜姚宋之功乎假而不為世用此
諸人者可以立言可以立節不能泯泯默默以與草
木同腐其所以報閣下終始生成之賜者宜如何哉
閣下主盟吾道且樂得賢才而教育之一言之利一
引手之勞宜不為諸生惜也

上宗巡按子孝

明 陳茂烈

蕭有孝子劉閔字子賢水南卹居去城二十里許不
攻舉子業敦尚古學言必謹行必慎周旋折旋依故
規矩雖燕居之際亦若賓祀盜有志於操存而刻意
於檢束也父早喪事母盡孝溫清定省一出於誠菽
水之奉必竭其力母或稍不悅即自縛請罪厥心惶
惶也母樂善養而忘其貧母卒廬墓三年哀毀幾絕
處幼弟亦曲盡其情子然以禮自持似無所容者然
於鄉人無所忤親族敬愛之疎散者亦畏憚之彼則
不知毀譽不顧流俗篤信而無所疑孝友之行遠近
慕之遺子弟從之游惟教以敦古道收放心養德性
聞者莫不興起藩臬諸公聞其名或贖災或餽遺或
先加禮焉郡守王公弼每值大祭必請同齋宿又立
鄉學於藩司之左樹式國人甘貧守禮始卒弗渝禮
貌或衰飄然而去固非貨利所能屈家無產業學祿
亦無苟得寒暑一敝衣簪簪僅糊口未嘗不怡然也
歲庚申大饑幾爲餓殍於人亦無所求鄉士夫相與
周之平生讀書專意禮學時祭報本隨力而做古以

行少司徒鄭公廷綱時與講明禮度都憲林公待用
薦於朝云斯人也才雖短於治事行實足以勵俗今
年踰知命自守堅定爵祿不加饑寒不免是固其所
甘心焉者其如世教何哉尚文尚行治忽攸關上行
下效形聲而影響若拔之於困窮之中置之於儒紳
之列或博士或助教使天下士知斯人也以行舉則
知進賢固不專於科目之一端也安知不有卓行之
士見舉於人而爲國之用哉事閑風化不容緘默伏
乞尊裁幸甚